

**Nunatsinni innarluutilinnik sullissisuusut ilinniagaqarnissamut  
piginnaangorsarnissamullu pisariaqartitaat aallaavigalugit Naalackersuisut  
iliuusissamik suliassamullu piareersaasiamik innarluutilinnik sullissinermi  
piginnaangorsarnissamut pisariaqartitat tamakkiisumik pigilernissaannut  
tikkuussisunik UPA 2015-mut saqqummiusseqqullugit peqquneqarnissaannik  
Inatsisartut aalajangiiffigisassaattut siunnersuut.  
(*Ruth Heilmannimit, Siumut, saqqummiunneqartoq*)**

pillugu

**Ilaqutariinnermut Peqqissutsimullu Ataatsimiititaliap isumaliutissiissutaa**

Siunnersuutip aappassaaneernejarnimini saqqummiunneqartoq

Ataatsimiititaliaq kingullermik suliarinninnermini ukuningga inuttaqarpoq:

Inatsisartunut ilaasortaq Lars P. Mathæussen, Siumut, siulittaasoq  
Inatsisartunut ilaasortaq Knud Kristiansen, Atassut, siulittaasup tullia  
Inatsisartunut ilaasortaq Karl-Kristian Kruse, Siumut  
Inatsisartunut ilaasortaq Anders Olsen, Siumut  
Inatsisartunut ilaasortaq Agathe Fontain, Inuit Ataqtigiit  
Inatsisartunut ilaasortaq Mimi Karlsen, Inuit Ataqtigiit  
Inatsisartunut ilaasortaq Juliane Henningsen, Inuit Ataqtigiit

Ulloq 9. april 2014-imi siullermeerinerup kingorna siunnersuut ataatsimiititaliamit sukumiisumik naliliivigineqarpoq.

**Siunnersuutip imarisaa siunertaalu**

Innarluutilinnut immikkoortortani sulisunut ilinniartitsinissamik, ilinniaqqinnissamik pikkorissarnissanillu pisariaqartitsinerup qanoq naammassineqarnissaanut innersuussisumik periusissiamik iliuusissatullu pilersaarummik UPA 2015-imi saqqummiussisoqarnissaa qulakkeerneqassasoq aalajangiiffigisassatut siunnersuummi matumani siunertarineqarpoq.

**Inatsisartuni siullermeerlugu suliarineqarnera**

Innarluutilinnut immikkoortortami sulisunut ilinniartitsinissamik qaffassarnissamillu pisariaqartitsinerup qulaajarneqarnissaa pisariaqartinneqartoq Naalackersuisut nassuerutigaa, tamatumalu kingunerisaanik siunnersuutigineqartup akuerineqarnissaa inassutigalugu. Tamatuma kingorna siunnersuutigineqartoq partiinit tamanit pitsaasumik tiguneqarluni, aammalu Siumumiit, Inuit Ataqtigiinniit, Atassummiit Demokraatiniillu allakkatigut

oqaaseqaatinik tunniussisoqarluni. Siullermeerinermit saqqummiunneqartut tamakkiisut innersuussutigineqarput.

Siunnersuut pillugu tunngaviusunik isumaqatigiinneq aallaavigalugu Ilaqutariinnermut Peqqissutsimullu Ataatsimiititaliamut suliassanngortinneqarpoq.

### **Ataatsimiititaliaq siunnersuummik sularinninnera**

Ataatsimiititaliap suliassaqaarfiisa iluini soorlu isumaginninnikkut peqqissutsimullu tunngasuni sulisoqarniarnerup tungaatigut politikkikkut eqqumaffigineqarnera Ilaqutariinnermut Peqqissutsimullu Ataatsimiititaliamit pissusissamisoortutut pisariaqartutullu isumaqarfigineqarpoq.

Innarluutilinnut immikkoortortat iluini sulisutigut tulluussartoqarnissaa pisariaqartitsinerlu naapertorlugi ineriartortitsisoqarnissaa inuiaqatigiittut siumut isigisumik qulakkeerinnittumik periusissiamik iliuusissatullu pilersaarummik saqqummiussisoqarnissaa aalajangiisuulluinnartuusoq siunnersuuteqartoq assigalugu ataatsimiititaliaq isumaqarpoq.

Sulisoqarnerup qulakkeerneqarnissaa siunertaralugu aammalu pisariaqartumik qaffassaanerup ingerlanneqarnissaa siunertaralugu peqqissutsimut isumaginninnermullu tunngasuni periusissiamik iliuusissatullu pilersaarummik ataqatigiissaarinissaq pingaaruteqartoq ataatsimiititaliamit erseqqissaatigineqassaaq. Sulisut arlallit peqqinnissaqaarfiup isumaginninnerullu iluini sulipput, pisariaqartitsinerillu tamakku qulaajarneqalerpata pingaartinneqassapput. Napparsimasunik sungiusaaqqinnerup ingerlanerani assersuutigalugu tagiartuisartut pillorissaasullu peqataatinneqartarput, atuisut napparsimajunnaarsimasunut kisiannili sulisunit taakkunanga ingerlaavartumik katsorsarneqarnissaminut pisariaqartitsisunut innarluutilinnut immikkoortortat iluini aamma sulisut pineqartut atuisunik ingerlaavartumik sullissinermi akuutinneqartarput.

Pisut ilaanni kommunit sulisitsisuusarput pisullu ilaanni Namminersorlutik Oqartussat sulisitsisuusarlutik. Ilinniaqqinnissamut qaffassarnissamullu sulisitsisoq tunngaviusumik akisussaasuvoq, tamanna suleqatigiit ataasiakkaat suleqatigalugit ingerlanneqartarluni.

Sulisunut innarluutilinnik sullissisunik kommunit sulisitsisuugaluarpataluunnit pisariaqartitat naapertorlugit ineriartortitsinermik politikkikkullu anguniakkat periarfissaqartinnissaat Naalakkarsuisut Inatsisartullu inatsisitigut aningaasatigullu sinaakutissanik ilinniartitsinermi qaffassaanermilu neqeroorutinut qulakkeerinninnissamut aalajangiisuusumik suleqataapput.

Inuiaqatigiit pisariaqartitallu allanngoriartorput. Innuttaasut nuttarneri aaqqissugaanerlu allanngoriartorput siumut isigisumik naleqqussarfigisariaqakkagut. Assersuutigalugu utoqqaat amerliartorput isumassuisussallu ikiliartorlutik. Immikkoortuni arlalinni aammalu

isumaginninnikkut peqqissutsimullu tunngasunut ilinniarsimasunik annertuumik Kalaallit Nunaat amigaateqarpoq. Ataatsimiititaliap suliassa qarfiisa ataanni assersuutigalugu nakorsat, peqqissaasut isumaginninnermilu perorsaasut amigaatigineqarput. Ilinniagallit ataasiakkaat suliassa qarfimmi iluanni pisaqartitamik immikkuualuttuunut aammattaaq naleqqussarsinnaasariaqarput, taakkulu inuiaqatigiinni pisariaqartitanut naleqqussarsimasariaqarput. Isumaginninnermi perorsaasutut qinigassat arlaqarput. Perorsaanermi tapersersortitut imaluunniit tapersersortitut aamma immikkut ilinniagassat arlaqarput, apeqqutaalluni napparsimasoq imaluunniit innutaasut sorliit sullinneqarnersut. Innarluuteqarnerit assigiinngitsorpasuupput, innarluutigineqarput qanoq ittuunera apeqqutaalluni sulisunik immikkut pisariaqartitsisoqartarluni.

Siunnersuuteqartoq Naalakkersuisullu assigalugit ataatsimiititaliamit pingaartinneqarpoq, sulisinnaasut tamaasa atorneqartariaqarnerinik, isumassuinnermummi immikkoortortani ineriartortitsinnermi kivitsisussanik isumassuinnermik sulialinnik amigaateqarluinnaratta. Inunnik isumassuinnermillu sullissineq tamanut pissarsiaqarnarluinnartuuvoq, peqatigisaanilli ataatsimiititaliamit pingaaruteqarluinnartut erseqqissaatigineqassaaq eqqortunik pisariaqartunillu piginnaasaqarnissaaq pisariaqarmat. Ataatsimiititaliap inunnik sullissisut qujassutissaqarfigalugit misigisimavoq, politikikkulli anguniagaavoq ilinniarsimasunik amerlanerusumik pisariaqartitsinerput, ataatsimullu isigalugu innarluutilinnut immikkoortortami piginnaasat qaffassarneqartariaqarlutik. Ilinniartitaaneq piginnaasanillu qaffassaaneq pingaaruteqartuupput pissarsiaqarnartuullutillu, tamanna sulisunut innarluutilinnullu atuuppoq.

Ataatsimiititaliamit naammagisimaarlugu maluginiarneqarpoq Naalakkersuisut siunnersuinnermik sullissivik Epinion suleqatigalugu arlalitsigut inuit immikkut pisariaqartitsisut pillugit misissuititsisimammat. Misissuinerit taakku saqqummiunneqarnissaannut ataatsimiititaliamit qilanaarineqarluni utaqqineqarput.

Inunnik immikkut pisariaqartitsisunik misissuinerup innarluutilinnut immikkut pilersaarutininik timitalerneqarnissaa aammalu innarluutilinnut isumassuinnermullu immikkoortortani sulisunut ilinniartitaanermik pikkorissarnermillu neqeroorutinut ilisimasat pilersaarutillu taakku aamma ataqatigiissaarneqarnissaaq pingaaruteqarmat ataatsimiititaliamit immikkut erseqqissaatigineqassaaq, taamaalilluni suliatigut neqeroorutigineqartut pisariaqartitsinnermut naapertuullutillu ersersitsisinnaaqullugit.

Maannalumi assersuutigalugu tarnip pissusaanut tunngasunut periusissamut, ineriartornermikkut kinguarsimasunut tunngasunut periusissamut, ADHD-mut tunngasunut periusissamut, autismertunut tunngasunut periusissamut, timimikkut innarluutilinnut il.il. tunngasunut periusissamut qimerluugaqarpugut, periusissallu taakku ilinniartitaanermik pikkorissarnermillu neqeroorutinut ataqatigiissaarneqassapput.

Ataatsimiititaliamit ilimagineqarpoq tatigineqarlunilu, Naalackersuisut ilinniartitaanermut periusissiaannut innarluutilinnut immikkoortuni sulisoqarnerup tungaatigut pisariaqartitsinermi periusissiaq iliussissatullu pilersaarut kissaatigineqartutut ilanngunneqarnissaa, tamannalu aamma isumaginninnermut peqqinnissaqarnermullu tunngatillugu naatsorsuutigineqarluni.

Innarluutilinnut immikkoortortap kommuninut nuuneqarnerani innarluutillit atugaasa ajornerulersinneqannginnissaat naatsorsuutigineqarsimammat, ataatsimiititaliamit innarluutilinnut tunngatillugu immikkut erseqqissaatigissallugu pingartinneqarpoq. Saqqummiussinerup maannakkut ingerlasup nalilersorneqarnissaa eqqaamallugu ataatsimiititaliamit qilanaarineqarpoq. Inatsisissatut siunnersuut UPA2010/121-p aappassaanneerqarnerani saqqummiussinnermut atatillugu isumaliutissiissummi pineqartumi ilaqutariinnermut ataatsimiititaliamit ima erseqqissaasoqarpoq:

*Tamatamani erseqqissaatigineqassaaq suliassa qarfigimmi akisussaaffimmik tigusinissamut kommunit tamakkiisumik piareersimassammata, tassami taamaattoqanngippat tamanna innarluutilinnut pitsaanngitsumik kinguneqarsinnaammat.*

Siunnersuutip aappassaanneeraneranut atatillugu ataatsimiititaliap isumaliutissiisutaanut Naalackersuisut ima allapput:

*Ilaqutariinnermut ataatsimiititaliap inunnu annertuumik innarluutilinnut kommuunini sullissineq pillugu oqaaseqaataanut Naalackersuisut oqaatigissavaat, matumani siunnersuutip taamaallaat siunertarimmagu innarluutilinnik sullissinnerup kommuuninut nuunneqarnissaa, allanngortinniarneqanngilaq inunnik annertuumik innarluutilinnik sullissinnerup annertussusia.*

Innarluutilinnik isumaginninnerup kommuninut tunniunneqarnerata maanna nalilersorneqarnera innersuussutigalugu naliliinerup killiffia pillugu siunnersuutip matuma aappaassaanneerqarnissaanut Inatsisartunut ilisimatitsissuteqaqqullugu Ilaqutariinnermut Inatsisinillu Atortitsinnermut Naalackersuisoq ataatsimiititaliamit qinnuigineqassaaq. Naliliinerup qaqugu naammassineqarnissaa pillugu paasisaqarnissani ataatsimiititaliap pingaartippaa.

Inuiaqatigiinni atugarissaarnerup ineriartorteqqinneqarnissaanik Inatsisartut kissaateqarnerisa ingerlateqqinneqarnissaa siunnersuummi matumani attatiinnerneqarnissaa ataatsimiititaliamit isumaqarfigineqarpoq, tamatuma saniatigut innarluutilittatta isumassorneqarnissaat ilanngullugu.

Ilanngullugu, Naalackersuisut innarluutilinnut siunnerfilimmik ilinniartitaanermi inuussutissarsiornermilu neqeroorutigisinnaassaminnik suliamik ingerlatitseqqinnerat

ataatsimiititaliamit annertuumik qilanaarineqarpoq. Ataatsimiititaliamit akulerutitsiniarluni taamatut pingaarutilimmik suliaqarneq nersorniarneqarpoq.

**Siunnersuutip aningaasatigut kingunerisassai:**

Siunnersuutip piviusunngortinneqarnerani aningaasatigut kingunerisassai siunnersuuteqartumit saqqummiunneqarput.

Ataatsimiititaliamit tusaatissatut tiguneqarpoq, siunnersuuteqartumit erseqqissaatigineqarmat periusissiatut iliuusissatullu pilersaarutip saqqummiunneqarnissaanut atatillugu AC-fuldmægtigep qaammatit pingasut akissarsiaasa nalinganik aningaasartuuteqartoqassasoq, taakkulu 125,000 kr. Naligalugit.

Taakkununga ilanngunneqassapput nutserneqarneranut kiisalu naqiterneqarneranut siammarterneqarneranullu aningaasartuutit. Aningaasartuutissat taakku Naalakkersuisoqarfimmi pineqartumi aningaasartuutissat iluini ingerlanneqarsinnaapput, taamaattumillu pingaarnersiuinerit allat tullinnguutsinneqartariaqarlutik.


**Ataatsimiititaliap inassuteqaataa**

**Ataatsimiititaliap isumaqatigiissup matumuuna siunnersuut inatsisartunit akuerineqartussanngorlugu innersuussutigaa:**

Taamatut naatsumik oqaaseqarluni aammalu isumaliutissiisummi allassimasutut paasinnilluni matumuuna ataatsimiititaliamit inatsisissatut siunnersuut aappassaanniigassanngortinneqarpoq.



Lars P. Mathæussen,  
Siulittaasoq



Knud Kristiansen



Karl-Kristian Kruse



Anders Olsen




Agathe Fontain

25. april 2014



Mimi Karlsen

UKA 2014/111



Juliane Henningsen

**UKA 2014/111**

J.nr. 01.25.01/14FM-LABU-00111

J.nr. 01.38.01.03-00043